

四庫全書

史部

欽定四庫全書

史部

世宗憲皇帝上諭內閣卷九至十一

詳校官左都御史臣李綬

編修臣裴謙覆勘

總校官原任中允臣王燕緒

校對官主事臣張培

賸錄監生臣張永浙

欽定四庫全書

世宗憲皇帝上諭內閣卷九

雍正元年七月

上諭共二十六道

初六日

諭八旗都統等八旗世襲佐領及世職官員有年幼者於供職之處未曾歷練若不令人指教何由諳習規矩以底於成就嗣後凡十六歲上朝之佐領著委令一員率

領指教俟四五年後再令其自行供職其十八歲上朝之世職亦令委員指教俟三年後再令其自行供職將此通諭八旗都統等各當盡心教育一體遵行

初七日

諭禮部國家祀典必貴潔誠

先農壇每歲展祀且為親耕耤田之所最宜清肅舊制圍牆內有地一千七百畝以二百畝給壇戶種植五穀蔬菜以供祭祀餘一千五百畝每年交租銀三百兩以備

修理聞康熙四十年間內務府撥給園頭耕種粢盛蔬
菜無所從出惟向市井採買殊非潔淨精誠之意今著
園頭清還地畝仍給太常寺壇戶耕種以供祭祀之需
餘地一千五百畝著將内外圍牆查明丈尺每種地十
畝估計令其修牆若干務期加謹葺護毋致傾壞每年
將滿漢太常寺少卿派出一員不時稽察庶壇墳清潔
祀事更加虔謹矣

又

諭工部貢院內應用桌椅等器向俱五城借用民間之物頗為擾害用過給還之時又被蠹役多方勒索以致各寺廟及買賣人等種種苦累此等應用之物當交與工部備造一分俟考試之年取用事竣交回部內加謹收貯若典守人員懈怠以致毀壞遺失即令賠補數年後將舊物更換則桌椅等器全得整齊小民等亦免衙役勒索之苦此雖係小事該部大臣理應留心辦理若諸事漫不留心只圖僥倖保全官職朕前豈能僥倖何益

之有今特降諭旨勿謂朕躬親細事轉相竊笑也該部
議奏

初八日戶部遵

旨議覆遣官往

盛京江西湖廣採買米糧奉

上諭南方差漢御史或給事中一員動正項錢糧買米催
覓民船運來此項米石買畢即行起運趕上漕船可以
先到即先來如其不能在何處遇見即隨便行走此係

官買之米若交與地方官恐派累小民亦未可定不必
交與地方官運送著派同知通判等官一員協同買米
之員管運到京武職內派守備一員押運到淮之日總
漕處派守備一員更換盛京差滿官一員去近據內府
佐領等奏稱現今莊頭等將窖米一十一萬五千四百
八十四石糶賣一半其餘一半米石暫行存貯俟得新
糧於次年糶賣再庫內現存銀內留下七千五百餘兩
其十萬兩交與何處請旨此派去之員一到盛京將錦

州等處將軍府尹所管內府佐領所存米石查看總數
於近海口處兌十萬石即將內府佐領等所存庫銀動
用催覓民船裝運如倉內現存米石數目不敷動盛京
錢糧買米運送再天津衛係總會之所理應修建倉廩
其應建幾倉之處八月間送

梓宮時爾等面傳諭旨與直隸巡撫著直隸巡撫會同天津
總兵官定議具題建造

初九日

諭戶部兵部從前商人王綱明因虧空銅斤銀兩具呈願採買兩江浙閩湖廣五省營驛馬匹於每匹額價內節省三兩填補虧空後五省以王綱明所交之馬疲瘦不堪易於倒斃題請仍自行採買每匹扣銀三兩交部為王綱明補墊虧空此事雖行已數年但各省採買額價不敷不能採買贍壯營驛之馬恒至倒斃以致地方官員歲有賠累况商人王綱明虧空銀兩與各省地方官員何涉而代為補墊除從前五省解部補墊銀兩外以

後每匹扣銀著俱行豁免其王綱明尚欠銅斤銀兩若干該部作速查明著落王綱明等名下作何清結之處另行議奏

又內閣覆奏折本內兵部議給大臣官員等廕生奉上諭郎圖善代達福鏗特胡世屯大成俱著給與三品廕生伊等承襲祖父高爵其子孫習於安逸未必即能効力行走若給伊等一二品廕生以員外郎主事用恐不能稱職與其被堂官叅革不如給與三品廕生補用令

其學習行走豈不甚便如將來任事果優彼時朕自有
加恩之處此正朕成就伊等之意並非吝惜一二品廕
生而不給與也爾等傳集伊等宣諭朕意否則徒生怨
言且嗣後之効力人員反生懈心矣

十一日

諭內閣朕前降諭旨因年羹堯奏稱趙之壇情願捐銀一
萬兩往布隆吉爾地方築城効力朕念趙之壇係功臣
之後若伊才具不克勝知府之任道員事簡易辦欲捐

銀議叙以道員用可聽其効力若趙之壇才克勝任即
仍留知府用現今趙弘燮虧空庫銀三四十萬兩交與
趙之垣料理又何必另外捐銀此朕施恩之意也况年
羹堯啟奏築城已有張連登王之樞等可以竣事今復
遣往効力議叙似又開一捐例斷不可行若布隆吉爾
築城張連登等所捐之貲不克完工今年羹堯密摺具
奏再將情願効力者發往此朕之諭旨也爾等票簽全
不符合將朕緊要語句俱行遺漏總之大學士等不肯

盡心辦事及至錯悞在乾清門免冠謝罪甚屬非體爾等俱係

聖祖仁皇帝委任大臣

聖祖仁皇帝天縱生知兼之臨御日久諸事精熟爾等舛錯之處全賴

聖祖仁皇帝改正所以不至悞事今朕臨御之初內藉大學士外藉督撫提鎮爾等理應諸事勤慎盡心協辦如前日本上落去一字事雖甚小然不得謂小事便可輕忽

寫本雖係中書之事爾等肯用心細閱自無錯悞若大學士諉咎於學士學士諉咎於侍讀侍讀諉咎於中書則朕亦可諉咎於大學士諸事錯悞令天下人疑朕與大學士俱不看本豈不可恥又如前日蔡珽所奏之事即係年羹堯奏過之事爾等又票該部議奏朕疑其事或有異同照簽批發及觀部議仍是一事可見漫不經心此等之處大學士既不詳看學士等亦應詳看何一同玩忽至此朕若亦如爾等玩忽督撫本章概批依議

用人一途聽之九卿隨意保舉豈不省事但爾等可以負朕朕何忍負我

皇考之深恩乎况朕於爾等陳奏虛心採納並未有偏執之處朕非文過飾非之人人非聖賢孰能無過爾等果能指摘朕過朕心甚喜君子之過也如日月之食人皆見之及其更也人皆仰之改過是天下第一等善事有何繫吝以籍結為老成以退諉為謹慎非朕所望於爾等之意總之三年之內將向來怠玩積習務湏盡改倘仍

付之膜外不肯改易不特國法難宥即天理亦所不容矣

又

諭戶部朕惟治民之道在愛養民力蓋民力寬舒則元氣自復此裕阜之要務也山東山西河南三省連年田稼歉收朕軫念窮黎已發帑賑濟復將現年錢糧盡行緩徵而歷年民欠帶徵之項若仍行追比緩新而徵舊與兆姓終無裨益目今時雨霑足秋禾滋茂登穫在望俾

耕鑿小民終歲無催斂之煩家室有蓋藏之慶則力既
有餘輸將亦易來年自必急公完賦爾部將山東省康
熙五十八年至六十一年分年帶徵未完錢糧山西省
康熙五十六年至五十九年分年帶徵未完錢糧河南省
省康熙五十九年至六十一年緩徵錢糧作速行文三
省巡撫俱著停徵一年務使里井霑恩吏胥無擾以副
朕愛養民力之意爾部即遵諭行

十二日

諭戶部朕自臨御以來勤求民瘼事無鉅細必延訪體察務期利民而於徵收錢糧尤為留意惟恐閭閻滋擾此念時切於懷如江西省有漕米各州縣運糧到省又自省倉搬上軍船故有脚耗扒夫修倉鋪墊等項編載全書歷來支給已久自康熙二十三年部中誤駁不准支給行令追還嗣後一例駁追究無完解至三十四年

聖祖仁皇帝特頒諭旨將從前已經支給者俱免追賠恩至渥也至康熙三十八年部議又以腳耗與扒夫等項分

晰未清仍令扣追不知脚耗乃貼運之總名扒夫等項
乃支給之細數實一事非兩項也自康熙三十八年至
今已二十餘載應追銀五十一萬餘兩米六十一萬餘
石積累增多究無完解追比日久官民均受其累朕知
之甚悉特諭爾部將從前積欠盡免追賠向後准其支
給副朕加惠黎元體恤有司之意

十三日奉

上諭都統前鋒統領護軍統領副都統內頗有家計艱窘

之人頃者外省副都統等既已酌給親丁坐糧將如何
酌給伊等坐糧之處著總理事務王大臣等會同兵部
議奏

又

諭倉場侍郎糧運關係國儲必須遄行無阻始得及早抵
通自揚村至通州河道多有淤淺糧船起剝每至耽延
以致回空凍阻并誤新漕著該督嚴飭坐糧廳查看河
道有淤淺處作速挑濬深通毋使阻滯并知會天津總

兵官用心催趕且天津一帶地方向有販賣私鹽等弊
糧船不許停泊火速趨行直抵通州至抵通後速行起
卸交倉毋得需索抑勒苦累軍丁朕去年親自閱倉知
漕糧過壩一晝夜可五萬袋可見交卸甚易爾等加意
督催務使空船早得回南新漕亦可無誤漕運一事朕
親身閱歷纖悉洞知爾等倘不盡心料理或因勒索致
有遲延責無所諉

十四日

諭禮部朝鮮國歸順我朝以來恪盡藩職進貢年久在

太宗文皇帝

世祖章皇帝

聖祖仁皇帝時屢次施恩將伊國貢物減免今所貢禮物尚
多此內若有可能減去者爾部會同內務府確議具奏再
加減免以紓朝鮮民力

又

諭朝鮮國使臣密昌君李熾爾朝鮮國王啟疆東土於我

太宗文皇帝時誠心豫附恪守藩封我

太宗文皇帝

世祖章皇帝視同一家恩施優渥爾國王祖父亦能仰承厚

澤奉職惟謹百年於茲矣我

聖祖仁皇帝化成久道萬國來王念爾國君李焞幼纘嗣服
克紹前猷權不下移惠能撫衆數十年來職貢匪懈用
是

隆恩異數寵眷有加賚予便蕃貢物頻減病則賜之以珍藥

歿則錫之以榮名

特遣近臣優頌奠弔今朕纘承大統爾嗣王李昀遣爾恭進
賀表朕嘉爾嗣王忱悃肫篤又念爾係嗣王宗族特行
召見以示優禮爾歸告爾嗣王繼乃祖父之緒夙夜黾
勉慎守綱維毋替厥服長為屏翰不忘恭順克殫忠誠
朕必體

列聖怙冒弘仁俾爾遠藩保安全於永久

十五日奉

上諭欽差出京沿途地方官向有餽送督撫派於州縣州縣派於里民朕深知此弊於散賑催漕看河各欽差大臣官員出京時皆逐一諄諄告誡不令騷擾地方官民但恐陽奉陰違又恐地方官畏懼以不敢忽畧欽差之故仍蹈前轍且差去之大臣官員即能潔己自持而隨從人役未必盡能遵奉至欽差事畢回京之後督撫或借欽差公費名色開單分派州縣州縣不敢問其虛實州縣轉派里民里民不敢爭其多寡甚至以科派贏餘

或填虧空或充節禮種種弊端深可痛恨著各省督撫
於欽差經過之地即將所發上諭大張告示遍貼通衢
嗣後欽差務期恪遵訓諭嚴束人役毋得騷擾地方需
索餽送如欽差本無需索州縣官借名私派里民及暗
加大耗者著即指名題叅至督撫身為大吏尤宜廉潔
率屬倘有扶同苛派致擾民生者一經查出決不姑貸

十六日奉

上諭看來下五旗諸王將所屬旗分佐領下人挑取一切

差役遇有過失輒行鎖禁籍沒家產任意擾累殊屬違
例

太祖

太宗時將旗分佐領分與諸王非包衣佐領可比欲其撫循
之非令其擾累之也從前朕之伯叔為諸王時雖漸失
初意尚未過甚至朕兄弟輩所分包衣佐領之人既少
而差役復多因而不論旗分佐領包衣佐領一概令其
當差其餘諸王遂亦從而效之或有不肖王等因漁色

之故多斃人命人所共知且護衛等尚無不奏而擅行
革退之例如此日流而下則五旗之人竟有二主何以
聊生所關甚大嗣後仍照舊例旗分人員止許用為護
衛散騎郎典儀親軍校親軍或諸王挑取隨侍之人或
欲令所屬人內在部院衙門及旗下行走者兼管家務
或需用多人以供差役或補用王府官職或令隨侍于
姪著列名請旨將奉旨之處知會該旗都統等令都統
等覆奏其旗分人員不許擅行治罪必奏聞交部如不

請旨斷不可也倘有仍將旗分人員妄行擾累令其多供差役兼管散職著該旗都統等奏聞若都統等隱匿瞻徇一經御史叅劾即將該都統等治罪

十七日

諭大學士等史書務紀其真而史才古稱難得蓋彰善瘅惡傳信去疑苟非存心忠厚學識淹通者未能定得失於一時垂鑒戒於久遠也有明一代之史屢經修纂尚未成書我

聖祖仁皇帝大公至慎之心旌別淑慝務期允當惟恐幾微
未協遂失其真鄭重周詳多歷年所冀得良史之才畀
以編摩之任朕思歲月愈久考據愈難目今相去明季
將及百年幸簡編之紀載猶存故老之傳聞不遠應令
文學大臣董率其事慎選儒臣以任分修再訪山林績
學之士忠厚淹通者一同編輯俾得各展所長取舍折
衷歸於盡善庶成一代信史足以昭示於無窮著將滿
漢大臣等職名開列具奏

又

諭工部沿河州縣向有額設河夫自百名至數十名不等興工則併力濬築工停則分遣巡防損者隨補塌者隨培修搶擁護俱係熟諳夫役故雖偶有衝決不能為患近聞管夫河官侵蝕河夫工食每處僅存夫頭數名遇有工役臨時催募鄉民充數塞責以致修築不能堅固損壞不能隄防冒銷誤工莫此為甚嗣後著總河及近河各省巡撫嚴飭河道不時稽查按冊覈實禁絕虛冒

倘有仍前侵蝕貽誤河防者即行指名題參

十八日工部奏銷永定河劉乂口挑淺及京口營整
理船梶等錢糧奉

上諭所奏甚不明白若從前所議非是即當於此本內直
陳其非是之處今不行直陳是徒欲市恩邀譽而已凡
辦理國家事務君臣務須一體假使君有未是而臣居
其是或君居其是而臣有未是此皆足貽笑於天下可
將此事詳察議奏

又御史湯之旭條奏律例欵項請酌定畫一刊刻成編頒示天下奉

上諭此所奏律例畫一之事未嘗不是但天下事有治人無治法得人辦理則無不允協不得其人其間舞文弄法正自不少誠能秉公無私何患條例之繁假若陶賴孫渣齊勒什布赫成格等辦事雖條例畫一弊終難免著大學士等會同總理事務王大臣及刑部都察院詳酌密奏

二十二日奉天將軍唐保住叅奏虧空錢糧各官應照數追完奉

上諭將軍唐保住將虧空錢糧之存住等叅奏甚是歷年以來諸臣不知感戴

皇考寬厚慈祥之恩轉以侵盜國帑勒索小民之事視為故常此等相沿惡習朕必力加整理此案係已往之事是以但加申飭倘三年之後尚有如此敗露者必正典刑斷不寬宥爾等宜深悉朕心凡事須秉公辦理

二十六日總兵林國賢請以伊子准入南陽民籍兵部議奏應不准行奉

上諭林國賢准加贈右都督伊子准入河南南陽民籍嗣後提督總兵副將等官仍照例不許在任置產入籍外其叅將以下俱係微員任所縱有房產諒亦微薄若概行勒歸原籍必致困累爾等同九卿定議具奏

又福州將軍宜兆熊奏請福州駐防協領等缺將挨次應陞人員送部補授兵部議奏應不准行奉

上諭據宜兆熊所奏亦似近是各省城守尉缺出止將此一缺應陞之人咨送到部補用發回之後始將此陞缺應補之人咨送到部如此則缺既久懸而往返行走亦擾累驛站嗣後協領叅領佐領缺出仍照常循例將保送之人與本旗應陞之人一併引見其防禦以下等官照年滿千總例該將軍等於驍騎校領催內揀選人材可用能管轄兵丁者著來京引見記名者候缺出免其引見依次題補爾等會同總理事務王大臣兵部定議

具奏

二十八日戶部以蠲免項內蘇太屬下衛所舊欠屯折等項錢糧請

旨奉

上諭未完屯折銀二萬四百九十餘兩内存留俸工銀一千二百九十餘兩雖不應豁免但此事歷年已久該撫既稱實係拖欠在軍著一併豁免

二十九日

諭諸王大臣及內外文武各官朕惟自古帝王撫御寰區
治化隆盛中外臣民紀功述德頌禱情殷故天保之詩
卷阿之什擬升恒於日月期純嘏之彌長祝釐之詞形
諸歌詠者往往有之我

聖祖仁皇帝御極六十餘年至治神功參兩

天地深仁厚澤超邁百王薄海内外無不食德飲和淪肌浹
髓臣工黎庶無以致其感激愛戴之誠故每於

萬壽聖節京師暨直省各建道場誦經祝壽總因

聖祖仁皇帝恩德及人者至久感人者至深諸臣於無可報答之中勉竭忱悃以普天同慶之心微華封稱祝之意在諸臣亦藉以自盡其心耳今朕嗣位之初夙夜祗懼不敢少懈所以立政圖治者安能及

聖祖之萬一爾諸臣工於朕誕日倘仍照從前建立道場則自此以後將成定例在京王公以下及部院等官未免從事靡文稽遲公事在外文武大吏亦恐科派屬員貽累地方且以有用之財供無益之費既非朕以勤儉勵

有位之心又非朕以康阜期海內之意尚虛文而無裨
實政朕甚無取焉特宣布中外於朕誕日毋得建立祝
壽道場但冀內外諸臣各殫厥心勉襄化理勤修職業
利濟蒼生以慰朕宵衣旰食之焦勞即不啻天保卷阿
之祝頌矣若不遵諭旨朕必加以處分不少寬貸

又

諭大學士等藏地兵馬已撤計程將至內地從前統領兵
馬之大臣怠忽者多縱兵橫行騷擾民人種種無恥之

行朕所深知著嚴行該地方官並統領兵丁之大臣若不各自約束仍縱所屬兵丁跟役任意或前或後行走逞強搶奪肆無紀律地方官於何處拏獲即將該管官一併拘留該處請旨將統領之大臣從重治罪若地方大臣徇情隱蔽朕別有訪聞將地方大臣官員一併治罪將此諭旨明白曉諭兵馬經行各路軍民知悉

又

諭禮部湖南士子赴湖北鄉試必經由洞庭湖湖水浩瀚

無涯波濤不測六七月間風浪尤險間有覆溺之患朕
心甚為惻然或至士子畏避險遠裹足不前又非朕廣
育人材之意今欲於湖南地方建立試院每科另簡考
官俾士子就近入場永無阻隔之虞共遂觀光之願明
年二月為鄉試之期爾部可即行文湖南巡撫若能於
二月之前預備場屋則於明春即分湖北湖南兩閩考
試倘為期已迫預備不及則於下科舉行至於湖廣通
省取中原有定額今既分兩閩其取中之數應如何分

別之處著湖南湖北巡撫公議湖廣總督從公酌定具奏

世宗憲皇帝上諭內閣卷九

欽定四庫全書

世宗憲皇帝上諭內閣卷十

雍正元年八月

上諭二十道

初二日

諭各鹽政官員國家欲安黎庶莫先於厚風俗厚風俗莫要於崇節儉周禮一書上下有等財用有度所以防僭越禁騎奢也孟子亦曰食時用禮菽粟足而民無不仁

朕臨御以來躬行節儉欲使海內之民皆敦本尚實庶康阜登而風俗醇夫節儉之風貴行於閭里而奢靡之習莫甚於商人朕聞各省鹽商內實空虛而外事奢侈衣服屋宇窮極華靡飲食器具備求工巧俳優妓樂恒舞酣歌宴會嬉遊殆無虛日金錢珠貝視為泥沙甚至悍僕豪奴服食起居同於仕宦越禮犯分罔知自檢驕奢淫佚相習成風各處鹽商皆然而淮揚為尤甚使愚民尤而效之其弊可勝言哉爾等既司鹽政宜約束商

人嚴行禁止出示曉諭諄切勸誠使其痛自改悔庶循禮安分不致蹈僭越之愆而省一日之靡費即可以裕數日之國課且使小民皆知警惕敦尚儉約於民生亦有裨益庶不負朕維風振俗之意若仍前奢侈不知悛改或經朕訪聞或被督撫叅劾商人必從重究治爾等亦不能辭徇縱之咎

又

諭各關差官員國家之設關稅所以通商而非以累商所

以便民而非以病民也朕撫御寰區加惠黎庶惟恐民隱不能上達近聞榷關者往往寄耳目於胥役不實驗客貨之多寡而止憑胥役之報單胥役於中未免高下其手任意勒索飽其欲者雖貨多稅重而蒙蔽不報者有之或以重報輕者亦有之不遂其欲雖貨少稅輕而停滯關口候至數日尚不得過是以國家之額稅聽猾吏之侵漁以小民之脂膏飽奸胥之谿壑司其事者竟若罔聞知乎又聞放關或有一日止一次者江濤險急

河路窄隘停舟候關於商民亦甚不便嗣後榷關者務
須秉公實心查驗過關船隻隨到隨查應報稅者納稅
即放不得任胥役作弊勒索阻滯以副朕通商便民之
意至於崇文門收稅及分派各處查稅之人亦有多方
勒索分外苛求之弊京師為四方輻輳之地行李絡繹
豈宜苛刻滋擾監收者尤當不時稽查杜絕弊端爾等
若不遵諭旨經朕訪聞定行重治其罪

初三日御史孫塔等題叅戶部事件違限奉

上諭從前戶部堂官將部中事件累百壅積怠玩不理自怡親王辦理戶部事務於展限四十日之內一切積弊剔除殆盡獎勸屬員清理數千案件甚屬可嘉即使偶然遺漏一二小事不但無庸議處其清理如許事案尚應議叙察議之處著從寬免至御史孫塔等以逾限題叅如此方是凡勤敏効力之人偶有過失姑從寬宥其權在朕大學士亦不得徇庇情面草率歸結至於戶部職掌皆係銷算會同稽考錢糧之事較於別部加倍繁

多非如銓選地方員缺等項可比似應稍展限期得細
加察核於事更有裨益著都察院科道將戶部事件展
限歸結之處另行定議具奏

初九日內閣侍讀學士田文鏡賑濟山西事竣將借
帑之處面奏奉

上諭山西省平陽府屬之霍州靈石汾州府屬之平遙介
休石樓潞安府屬之襄垣黎城太原府屬之平定沁州
屬之武鄉九州縣借賑過饑民銀六萬五千六百七十

七兩盡行豁免不必令還著戶部行文該撫出示曉諭
咸使聞知

初十日

御筆親書

景陵碑匾復

命誠親王淳親王及翰林中善書者恭寫乃

召九卿及南書房翰林至

乾清宮

上諭曰

景陵碑匾事關重大誠親王淳親王素工書法朕已令其恭寫翰林中善書者亦令其恭寫朕早蒙

皇考庭訓每倣學

御書嘗荷

嘉獎今

陵寢碑匾朕亦敬謹書寫非欲自耀已長但以大禮所在不親寫於心不安爾諸臣可公同細看不必定用朕書須

擇書法極好者用之方愜朕心

十二日

諭兩江總督查弼納江南提督高其位署江蘇巡撫何天培浙江巡撫李馥太湖三萬六千頃連跨數郡地勢既廣支流復多為盜賊出沒之所平時既易藏奸巡捕又難著力故蘇常盜案多於他省良善被擾官吏處分皆因太湖為之巢穴也爾等均有統轄之責可公同確議遴選賢員清查嚴緝俾匪類就擒餘黨解散日後作何

稽察防範之法不使宵小復萌地方長享寧靜之福以副朕禁盜安民之意

十四日奉差閱河大學士張鵬翮等奏豫省北岸

欽提關係黃沁並衛河運道理合保固再奏家廠大壩北尾堤應築堤一道接連遙堤庶溢出之水不致下注又遙堤單薄應再加幫築奉

上諭曰

聖祖指示釘船幫挑水壩既應保固即當從壩尾接至遙堤

若從秦家廠北壩尾接至遙堤恐其兜水其秦家廠月
堤與從中填實工價應行估計之處著派一員前往與
齊蘇勒嵇曾筠石文焯議奏圖本一併賞去

十七日

諭總理事務王大臣大學士九卿我

聖祖仁皇帝為

宗社臣民計慎選於諸子之中命朕續承統緒於去年十一
月十三日倉猝之間一言而定大計薄海内外莫不傾

心悅服共享安全之福

聖祖之精神力量默運於事先貫注於事後神聖睿哲高出
乎千古帝王之上自能主持若朕則豈能及此也

皇考當日亦曾降

旨於爾諸臣曰朕萬年後必擇一堅固可託之人與爾等
作主必令爾等傾心悅服斷不致貽累於爾諸臣也朕自
即位以來念

聖祖付託之重

太祖

太宗

世祖創垂大業在於朕躬夙夜兢兢惟恐未克負荷向日朕
在藩邸時坦懷接物無猜無疑飲食起居不加防範死
生利害聽之於命蓋未任天下之重自視此身甚輕今
躬膺

聖祖付託神器之重安可怠忽不為長久之慮乎當日

聖祖因二阿哥之事身心憂悴不可殫述今朕諸子尚幼建

儲一事必須詳慎此時安可舉行然

聖祖既將大事付託於朕朕身為

宗社之主不得不預為之計今朕特將此事親寫密封藏於

匣內置之乾清宮正中

世祖章皇帝御書正大光明匾額之後乃宮中最高之處以備不虞諸王大臣咸宜知之或收藏數十年亦未可定諸王大臣等當各竭忠悃輔弼朕躬俾朕成一代之令主朕於爾等亦必保全成就篤厚恩誼豈非家國天下

之大慶乎朕意若此諸王大臣其共議之

又兵部奏平定西藏人員議叙奉

上諭平定西藏乃自古未至之絕域所以

皇考曾有從優議叙之

旨况

皇考當春秋高邁備兵於極邊宣揚威畧峻德鴻功允垂億萬斯年之美政也此一次議叙軍功前固無例可援後亦不得為例兩路率領八旗官員進勦之將軍等著給

與世襲三等阿達哈哈番議政大臣給與拜他喇布勒哈番副都統營總等給與施沙喇哈番其護軍校駍騎校給與頭等功牌二面仍加一級綠旗官員經大將軍等咨送冊開頭等者照攻取打箭爐功加一倍二等者功加五等三等者功加二等至於滿洲漢軍綠旗之外委官俱係一體効力人員無論由部委外委概行從優議叙以仰副我

皇考恩綸特沛從優議叙之

諭旨

十八日兵部奏議叙克復臺灣人員奉

上諭臺灣地方自古未屬中國

皇考聖略神威取入版圖逆賊朱一貴等倡亂佔據臺地

皇考籌畫周詳指授地方官員遣調官兵七日之內勦除數

萬賊衆克復全臺

皇考當春秋高邁威揚海外功德峻偉官兵感戴

皇考敎養之恩奮勇攻取甚屬可嘉固不必援引前例後亦

不得為例茲仰副

皇考從優議叙之曠典官員現行議叙功加外著概行各加一等總督滿保雖有失陷地方之罪但一聞事發即親往廈門撫慰衆心遵依

皇考指示調遣官兵七日之內克復臺灣滿保著兼兵部尚書職銜提督施世驃統領大兵徑度海洋鼓勵將士屢經大戰擊敗賊衆七日之內克復臺灣厥功甚大施世驃著給與世襲頭等阿達哈哈番總兵官藍廷珍曾協

助施世驃藍廷珍著給與世襲三等阿達哈哈番水師
營副將許雲失陷臺灣非關伊罪奮勇前進多殺賊衆
身又陣亡著給與世襲拜他喇布勒哈番叅將羅萬倉
遊擊游崇功俱係陣亡羅萬倉游崇功著給與世襲拖
沙喇哈番歐陽凱著追贈太子少保

二十二日

諭議政大臣爾等所議之事皆國家要務理宜慎密今議
政大臣議尚未行早已洩漏人人皆知於稠衆之中會

議奴隸亦不迴避可乎嗣後王大臣議政務宜慎密在
議政處執事之司官筆帖式等亦宜嚴加訓飭如有似
此洩漏者朕若訪聞必重治其罪不貸

又管理藩院侍郎事都統拉錫奏喀爾沁等處歲歉
乏食請俟查覆到日賑濟奉

上諭據奏俟查覆到日加恩拯救現今乏食人等必至失
所著戶部作速派官二員領銀五萬兩前往再著侍郎
本錫副都統阿林保作速馳驛前往喀爾沁俟錢糧一

到即行散賑扎薩克八處俱一面清查一面給發毋得

稽遲

二十三日奉

上諭恭謁

景陵時昔日

聖祖仁皇帝前親近之諸王大臣悉令得入

隆恩門至

享殿前叩謁 又奉

上諭蒙古諸王俱因

梓宮安奉

地宮竭誠叩謁著分為四班每日引一班進謁

二十四日奉

上諭

皇太后素性謙謹事

聖祖仁皇帝數十年未嘗少懈今暫安奉

皇太后梓宮於蘆殿

享殿內現奉

聖祖仁皇帝梓宮

皇太后前一應供獻及祭文不可由中門出入俱應於西門
行走以仰體我

皇妣謙冲至意

二十五日奉

旨翌日仍詣

景陵諸王滿漢大臣奏云昨日

皇上躬詣

三陵至

景陵哀痛過甚今日復詣

陵致祭

聖躬已極勞瘁况二十七二十九初一等日均屬大祭二

十六二十八兩日伏乞停止

親往奉

上諭

梓宮於初一日安奉

地宮及今每日親往尚得瞻仰

梓宮過初一日則不得瞻仰矣明日朕仍親往 諸臣復奏

云恭聞

聖諭臣等何敢再奏但昨日謁

陵時蒙

恩召近

梓宮舉哀親見

皇上聖心悲切號泣不止哀勞太過臣等不勝悚懼二十

九初一兩日禮數尤多大典攸關伏乞

皇上於二十六二十八兩日停止

親往奉

旨諸主大臣陳請再三此兩日暫停親往

二十六日奉

上諭曰

聖祖仁皇帝鹵簿內備鞍之御廄馬匹送至達里剛崖櫨養

終老此馬俱曾經

皇考乘騎著敬謹交與福壽牧養若有私自騎用及抵換者

事發即行處斬

二十八日

上以九月初四日

聖祖仁皇帝升祔

太廟

欽命大學士等恭點

神主奉

上諭點主一事所關最重古人必取名望素著德行純粹學問淵深者充此職任今爾等位既貴顯人品皆優故簡命爾等爾等當體朕敬重之誠勿視為差委故事須潔誠齋戒屏却思慮一塵不染

聖祖在

天之靈陟降上下爾等誠意所聚一若

聖祖神靈洋洋如在方副朕一片孝思爾等不必有意於哀

慟亦不必有意於恭敬亦不必有意於感格只以一誠
默契為是

二十九日

諭各蒙古王貝勒貝子扎薩克台吉他布囊等自爾祖宗

歸附

太祖

太宗以來蒙被聖化於茲五六代矣世締國姻恩深祿重兄
弟主臣洽比保聚安居樂業百有餘年其間厄魯特噶

爾丹猖獗羨兵破喀爾喀七旗侵及內扎薩克蒙古蹂躪遊牧之地

皇考為爾等三次自將出師乃滅噶爾丹使爾等永享太平之福六十餘年以來爾等屬下偶有饑饉災傷莫不發帑與糧資給畜牧更派富戶屯田代耕使饑者復安散者復聚非一次矣

皇考養育爾等蒙古恩澤重矣大矣曩者郭爾羅斯以歲饑聞朕仰體

皇考聖意即遣大臣前往發倉賑救置備牛羊給賞今喀喇沁翁牛特八旗又以歲饑聞復遣大臣前往即速查明饑口動用正項錢糧買米散賑夫一時阻饑朕雖賑之長年貧乏之民在爾各君長於本旗內裒多益寡互相赒恤以養育之庶幾得所耳若不知各子其民思所以養育之道仍然厚歛重徭納之於阽危之域而恃天朝之賑恤不特爾衆失所又重違朕愛養斯民之至意矣雖曰爾之屬下乎乃皆我

皇考歷年豢養之民也豈可使之至於散亡况爾屬下盡散孰為爾等納賦孰為爾等供徭愛民惠下是第一要務不可不知也連歲災旱頻仍今年又遭饑饉爾等各子其民者如何減賦如何輕徭如何裕其農功如何孽其畜牧爾等王貝勒大臣等議定務使各得生理以仰副我

皇考聖心以慰朕心定議之後倘有顯背公議仍然重賦苛役者爾等自思朕其奈何國法具在非朕所得而私也

爾等共相勸勉互相輔助遵諭奉行我

皇考目覩爾等長成愛如子孫事事包容處處軫恤爾等視

皇考如祖父恃

皇考之慈愛每事懈逸朕新即位務須各盡爾職謹慎小心
管轄屬下訓練兵丁嚴禁盜賊奉公守法循分安生仰

報我

皇考軫愛之恩俾朕得以仰法

皇考慈惠爾等至意始終保全永永勿替朕之願也今日特

於

皇考梓宮前諭爾等知之

世宗憲皇帝上諭內閣卷十

欽定四庫全書

世宗憲皇帝上諭內閣卷十一

雍正元年九月

上諭十六道

初一日工部奏康熙二十六年起五十八年七月止
曾任木倉監督人員所虧木植一概著落追賠照律
治罪奉

上諭木植事件舉國皆知此內亦有屈枉者亦有實在可

恨者該部應分晰明白具奏如一概寬免則不肖之徒
得以僥倖若俱各治罪其中屈枉人員不無可憫王大
臣必要除私秉公加謹查核方得明白

初五日

諭禮部自古祖功宗德制在不祧饗帝饗親祀應並舉報
本之情罔極配

天之典宜隆仰惟我

皇考聖祖仁皇帝亶聰御宇至德誠民早歲而攬宏綱恩覃

無外小心以勤昭事誠著升中

寢園備物於春秋

重闡將敬於朝夕軫萬民之疾苦水旱預籌勵百爾之勸懲
賢愚立辨赦愆宥罪仁風廣被祥刑發帑蠲租豐歲頻
聞減賦時邁歌而黃淮底定清問及而稼穡周知闕里
隆九拜之儀考亭躋十哲之列科目以增加而益盛士
子因訓飭而交修

聖自多能心猶好學總百家之間奧垂千古之典謨經天緯

地之文一貫萬殊之理禹鼎湯盤之句龍翔鳳翥之書
莫不薈萃并包裔皇典麗至於

皇威遠暢廟畧遐宣臨邊塞而萬幕傾心示神謨而三孽授
首察哈爾不敢伏莽厄魯特頓爾傾巢俄羅斯稽額以
奉共球烏斯藏望風而銷鋒鏑以至波澄紫海箐靜紅
苗雨露及於天維疆索通於地紐清寧合撰參兩大以
成能覆載同流兼三才而立極武功文德前代之所未
聞聲教車書史冊之所未覩建中錫福久道化成萬物

逸而

宸衷弗釋其勞四海寧而

皇躬弗辭其瘁六十一載豐功厚澤深浹人心四千餘年哲

后賢君難侔歷服紫壇紺幄知

天意之同符蒼璧黃琮思德馨之並薦朕纘承丕緒永念
前徽我

皇考聖祖仁皇帝允宜崇祀郊壇克配

上帝以後冬至祈穀祭

天俱奉

聖祖仁皇帝同

太祖高皇帝

太宗文皇帝

世祖章皇帝配享夏至祭

地亦如南郊祈穀禮祇奉配享其應行禮儀爾部詳議具奏

初八日

諭順天府府尹鄉飲酒禮乃敬老尊賢之古制近聞年久

視為具文所備筵宴亦甚不堪爾衙門應加謹舉行

十一日奉

上諭查驗八旗器械甚屬緊要從前查驗時彼此那借及租箭呈驗之處朕所深知現今日期已近若今年查驗器械勢必竭蹙租賃糜費兵丁銀錢殊為無益今歲不必查驗著勒限一年令將器械修理完固預備朕於明歲十月間遣信任大臣會同兵部務令一日查驗一旗驗畢封貯公所再驗一旗將二十四旗盡行驗畢交還

各旗方無那移租箭之弊著將此曉諭八旗令各預備

又

諭戶部巡撫裴梓度因起蛟水泛請捐俸工賑恤被水居民等語各省督撫偶遇地方有事俱即請捐俸工殊非正理俸工特為贍養伊等家口而設縱將通省官俸捐助為數無幾有何裨益至若工食盡行捐出胥役人等又何以應差行走如果民遇災祲該督撫即應委聞動支正項錢糧若小有水旱或些須修理隄岸城垣該地

方大小官員有願出己資捐助効力者何必具題即欲報聞亦止可另行繕摺具奏該部行文直省督撫凡地方遇有公事奏請捐助俸工之處著永行停止

又理藩院奏請賑濟扎魯忒貝勒魯空等三旗乏食人等奉

上諭著再給銀二萬兩交與本錫阿林保齎往此項為恐從前發去銀五萬兩或有不敷添解備用並非分別此一旗給與若干彼一旗給與若干也可將兩次銀兩合

數旗之人通同散給如有不敷再行請旨

十六日戶部將江蘇所屬蘇太等衛舊欠項下不應

蠲免銀兩請

旨奉

上諭此民屯地丁等銀三百五萬九千餘兩內地租等項
銀六千八百七十餘兩雖不應豁免但此事歷年已久
實欠在民著一併豁免

十七日議政王大臣等議准浙閩總督滿保奏請修

築海寧塘堤奉

上諭錢鏐時所築塘堤中間雖被沖壞至今尚有存者數年來督撫等所修塘堤俱虛冒錢糧於不當修築處修築以至隨修隨壞又聞赭山有三處海口今一處淤沙壅塞水不通流若濬治疏通使潮汐不致留沙壅塞則海寧一帶塘工方可保固言之者雖未必稔知然不可不留意抑或地方大臣恐糜費錢糧此等處雖明知而不顧也爾等傳諭該督撫知之

十九日

諭大學士等朕近於

聖祖仁皇帝所遺書笥中檢得未經頒發

諭旨一道以明太祖崛起布衣統一方夏經文緯武為漢唐
宋諸君之所未及其後嗣亦未有如前代荒淫暴虐亡國
之跡欲大廓成例訪其支派一人量授官職以奉春秋陳
薦仍世襲之朕伏讀之下仰見我

聖祖仁皇帝海涵天覆大度深仁遠邁百王超軼萬古朕思

史記東樓詩歌白馬商周以來無不推恩前代後世類
多疑忌以致歷代之君宗祀殄絕朕仰體

聖祖如天之心遠法隆古盛德之事謹將

聖祖所貽

諭旨頒發訪求明太祖支派子姓一人量授職銜俾之承襲
以奉春秋祭享但恐有明迄今年代久遠或有奸徒假
冒致生事端爾內閣大學士即會同廷臣詳明妥議以

副

聖祖仁皇帝寬仁矜卹之至意

二十日奉

上諭從前

皇考將公主郡主等下嫁與蒙古者欲其撫恤蒙古之屬下人也今公主郡主等不知體恤往來行走整年居住京師兩處安家蒙古甚為勞苦嗣後欲來京師著先請旨得旨後方可來京不請旨者不得來京

二十二日直隸巡撫李維鈞奏請直隸省地方丁隨

地起戶部議准奉

旨交與九卿詹事科道會同確議具奏九卿等奏應行令
該撫確查各州縣田土因地制宜作何攤入田畝之
處分別定例庶使無地窮民免納丁銀之苦有地窮
民無加納丁銀之累奉

上諭巡撫李維鈞條奏丁隨地起一事九卿竝不據理詳
議依違瞻顧皆由迎合上意起見即如本內有地窮民
一語既稱有地何謂窮民不與有米餓莩之語相似乎

不但此也凡九卿會議理應將所議事件預先詳審至臨議時各出己見平心靜氣公同商確以求至當邇來九卿坐班多有不齊及至會議彼此推諉不發一言或假寐閒談遲延累日令一二科道新進者昌言於衆便羣相附和以圖塞責在九卿遲延一日內而六部八旗外而各省俱因以遲延矣以此為居官安靜及至保舉議行事件又有請託賄賂等弊爾等在

聖祖時皆受

深恩不圖實心報効每事迎合有時依議准行使便謂迎合得
計遇有駁回事件雖加嚴飭又謂上有深意以此事君
負恩殊甚此皆朕之所深知而不忍見者

聖祖與

天相似諸臣豈能以人意揣度

天心所有種種惡習皆在

聖祖洞鑒之中包涵已久有何益處朕即位以來將此等惡
習概置不究爾等自揣平日所為亦當知懼亦當知感

矣今仍欲迎合朕意朕於諸事本無成見有何迎合之處所發會議事件原欲與衆共商即書所云汝則從龜從筮從卿士從庶民從之意也元首朕肱誼同一體朕祇欲諸弟盡為賢王諸臣盡為良臣事事當理即朕意耳朕從不自以為是所議允當朕即不從不妨面折廷諫再三執奏即不顯言亦可密摺數陳至爾等以堯舜比朕朕果能上法堯舜乎抑屬贊頌之詞也如或不能正可因此自勉即爾等亦當上法古名臣也

聖祖良法美政布在方策朕與爾等期共相龜勉以臻至治

朕宵旰勤勞爾等可圖安逸乎嗣後務宜洗心滌慮痛改前非凡事皆持公正止論是非毋事揣度朕實心延納果能據實直陳豈肯拒阻若仍蹈前轍朕或據理飭行或擇人另議爾等豈不自愧乎原本發還九卿著仍照戶部議行

二十六日禮部請定取中進士名數奉

上諭今科進士照朕所定一百八十名之數入榜取中仍

降旨與總裁官朱軾張廷玉此外不拘省分不限額數
有可取佳卷選出另行具奏放榜後其落卷照今春檢
閱之例檢閱

二十八日湖廣總督楊宗仁奏請定百姓食鹽價值
奉

上諭據楊宗仁奏請欽定鹽價伊並不體察事理但固執
伊所原題具奏朕視民商皆屬一體如何定奪士農工
商雖各異業皆係國家子民理當一視同仁督撫偏袒

百姓巡鹽御史偏袒商人可乎總督係地方大臣凡辦
理事務必須平心靜氣期於合理楊宗仁身為總督於
此等處並不留意混行瀆奏殊溺大臣之職著黃叔琳
謝賜履前往楚省會同楊宗仁將鹽價作何酌定之處
確議具奏謝賜履印務著何順暫行署理

二十九日

諭大學士等人臣膺命効職果能實心愛民清白自矢則
官去民思甘棠留詠有愈久而不能忘者從古有之若

今之生祠書院不知始自何人自督撫提鎮以及監司
守令所在多有究其實不過官員在任之時或係下屬
獻媚逢迎或地方紳衿有出入公門包攬詞訟之輩倡
議糾合假公派費佔地興工甚至園囿亭臺窮極華麗
勞民傷財一無顧惜及其後或為宴會遊玩之場或本
官竟據為產業考其年月則官員去任之後百姓追思
而特為興造者甚少此事向曾禁止而踵弊如故當再
為嚴飭嗣後如有仍造生祠書院者或經告發或被糾

叅即將本官及為首之人嚴加議處其現在之生祠書院如果係名宦去任之後民間追思益造者准其存留其餘俱著地方官查明一概改為別用或為義學延師授徒以廣文教如此則以無用為有用惜民財力杜絕虛浮於地方風俗大有裨益

又理藩院奏陣亡台吉進達克

恩加卹典伊子噶爾馬策布騰等謝

恩奉

上諭蘇尼特王垂濟拱蘇勒本旗下台吉管理旗務官進達克帶領伊旗下兵丁與逃竄之厄魯特羅卜藏錫拉珀等廝戰身亡甚屬可嘉此並非出兵亦並未令其率衆追擒伊即率領兵丁前去在陣身亡是以朕交部議叙部議二等台吉加一等授為頭等台吉具奏朕曾特降諭旨施恩將進達克照依公爵致祭今襲頭等台吉進達克之子噶爾馬孫多布著授為輔國公伊第二子噶爾馬策布騰亦曾奮勇對敵受傷著授為頭等台吉

第三子共格垂穆皮爾亦曾臨陣著授為二等台吉

三十日

諭內閣朕惟我

太祖高皇帝天錫智勇肇造鴻基

太宗文皇帝繼業恢圖布昭聖武

世祖章皇帝統一寰區功成治定其時内外文武勲舊臣工

戡亂効力茂著厥功

皇考聖祖仁皇帝特勅內閣翰林院諸臣纂修

三朝國史用揚

列聖之鴻謨並及諸臣之勞勳迄今尚未編輯矧惟

聖祖仁皇帝垂統六十餘年以守兼創

恩澤聲教遠及海外絕域

德業之盛超於百世凡於指授所及能顯立功勲誠敬任事
之大臣與夫軼羣出衆有才之人若不及今博採聞見
薈萃成編恐閱世久遠或致闕畧著將國初以來文武
諸臣內立功行間誠敬任事卓越之才有應傳述者行

文八旗將諸王貝勒貝子公以及文武大臣之冊文誥
勅碑記功牌家傳等項詳加查核暨有顯績可紀者亦
著詳察逐一按次彙成文冊悉付史館刪去無稽浮夸
之詞務採確切事實編成列傳如此可以垂之萬世庶
為國家宣力有功之大臣不致泯沒



世宗憲皇帝上諭內閣卷十一

欽定四庫全書

史部

世宗憲皇帝上諭內閣卷十八
二至八

詳校官左都御史臣李綬

編修臣裴謙覆勘

總校官原任中允臣王燕緒

校對官主事臣張培

謄錄監生臣張永漸

欽定四庫全書

世宗憲皇帝上諭內閣卷十二

雍正元年十月

上諭十八道

初三日

諭歸化城都統丹晉及兩旗官兵前者

聖祖皇帝由寧夏親征漠北時巡狩歸化城地方見爾等歸化城土默特兩旗官兵士衆委靡弓馬不習法度日以

廢弛因將兩旗都統革退另選在京都統副都統叅領等員管轄歷年訓練有方軍律嚴整舊習漸改有志向上是以數年以來選用在京人員之例已經停止今爾保送之官兵人等盡皆弓馬嫻熟且兩旗兵弁行伍整齊凡有行圍及出征等事與內地兵丁一體効力此皆我

皇考教育爾等所致也歸化城土默特兩旗原在四十九扎薩克內其都統副都統等官皆係國初歸附之土默特

功臣子孫世職今念爾等既已棄咎從忠允宜遵復舊例楚宗著授京城額外都統楚宗員缺將原任都統阿必達之子副都統艮敦補授艮敦員缺著丹晉將爾兩旗內應補人員與原任都統副都統世家子孫及叅領內人材可用儀表修偉向能管轄兵丁曾經効力行間人等查明保送引見朕將親擢焉

初四日

諭總理事務王大臣各部院衙門無品筆帖式往往遲至

二三十年始得陞授小京官伊等在部院効力年久不得一職甚屬可憫著大學士學士翰林院掌院學士會同吏部將伊等與候補之筆帖式等一同考試擇其文理優長者給與品級嗣後三年一次考試其優等者俱著給與品級

初五日

諭兵部驛站關係重大經朕屢加嚴諭然其間積弊難以盡詰有在官之累有在民之累如直隸山西等省差徭

更為浩繁雖驛馬足數亦供應不敷乃內而兵部外而
驛道於給發馬匹時官吏通情受賄往往所給浮於勘
合之數且行李輜重皆令驛卒乘馬背負多至八九人
不等所到州縣以見馬換馬向有舊例不敢詰問至督
撫提鎮經過之處更唯命是從嗣後照勘合之外有敢
多給一夫一馬者許前途州縣即據實揭報都察院以
聽糾叅如甲縣容情不揭而被乙縣揭報者並甲縣一
併治罪其督撫提鎮騷擾驛遞者皆照此例庶少甦在

官之累至若河南山東諸省離京稍遠謂耳目易欺每驛額設馬匹不過十存三四其草料工食仍照舊開銷且逐年詳報倒斃侵蝕補買之價差使一至則照里科派將民間耕種牲口強遣當差令其自備物料跟隨守候種種累民尤屬不法著該地方督撫將所有驛站逐一徹底清查缺額者勒限補買至派借民間牲口尤當勒石永禁違者即從重治罪

又

諭內務府直隸省州縣亦可與爾衙門文移往來如莊頭人等有在州縣地方生事者著該州縣官員竟行呈報爾衙門爾等查問訓飭若不悛改即行斥革著行文直隸巡撫凡有皇莊州縣地方遍行曉諭至各莊頭交糧時須逐一查問將生事之人嚴加訓飭不肯悛改者即行斥革

又兵部奏山西出征兵丁倒斃駄載輜重馬匹應令
賠補奉

上諭山西兵丁遠馳異域甚屬勞苦其倒斃駕載輜重馬匹著照川陝例免其賠補

初六日奉

上諭前差連肖先往河南賑濟回京時朕諮詢以河南官員賢否據奏俱屬不及無一賢員朕因特選七員命往石文焯應將劣員即行叅革其員缺即應以命往人員補授乃徇庇優容並不將不及劣員查叅只將陞任丁憂病故等缺以命往人員擬補具奏殊屬不合督撫係封

疆大吏地方有劣員應即叅革倘優容不行題叅留住一日則地方百姓受害一日外省大僚果能自殫忠誠何致轉畏屬員著行文嚴飭石文焯伊屬員內若果無庸劣盡是賢能著以五人輪次來京引見

又湖廣總督楊宗仁審擬原任桂陽縣知縣董瑞受賂一案仍照原題擬流援赦刑部議駁具奏奉

上諭依議部駁事件督撫每固執原題具奏一經駁回往返遲誤干連人等多至受累嗣後部內應駁事件督撫

若固執原題具奏部內即將督撫一併議處奏聞如不應駁事件而部內故求疵隙題駁該督撫即將不應駁之情由奏聞

初八日奉

上諭在京八旗及外省兵丁凡係三年以內從征自軍前回者無庸議及如久在行間裁減撥回者除現在當差行走之人外其因衰老有疾革退人內或其子弟錢糧可以倚賴或其產業尚足自給者不必併查若本身不

能當差又無可倚賴之人著各該管官逐一詳查彙奏
賞給伊等半分錢糧養贍終身

又禮部奏孝行節義既經設立祠宇其建坊銀兩應
請停給奉

上諭孝行節義建立牌坊年久毀壞遂致湮沒今欲設立
祠宇特為昭垂久遠之意並非欲節省錢糧部議建立
祠宇停給建坊銀兩不合建坊銀兩仍著給與

十二日

諭內閣九卿詹事科道從來用人之道必兼聽並觀疇咨
博採方能允當而無失朕於選用人員每諮詢卿等正
以朕一人之耳目有限不若合爾諸臣之見聞始無遺
漏爾等僉云未能深知互相推諉夫盈廷諸臣各省之
人咸在同鄉親故豈無確實見聞其賢者即有小善亦
應稱舉其不肖者即有小惡無容隱匿若知其賢而不
言是謂蔽賢知其不肖而不言是謂黨惡即如九月分
選官摺內有劉尚儉者係四川夔州府叅革貪酷知府

劉天觀之子其父刻剥小民之脂膏為伊予捐納罪莫大焉如此之人豈可錄用在廷豈無一人知之者乃俱緘默不言以此推之可見知而不言者甚多爾等之意惟恐結怨於朋友遂容隱不肖以保全其功名雖誤朕選用之事而不顧貽害於地方而不恤試思得罪於朋友與見棄於君父孰重而孰輕全一人之功名與貽地方之患害孰大而孰小况卿等所舉之賢不肖朕不過於引見時借以叅酌自有裁奪并欲知薦者之居心與

知人不知人所舉賢者亦只據現在有善可稱非責爾等保其終身無過不必過慮後日之貽累嗣後務宜痛改積習苟有見聞即從實舉出進賢勿避嫌退不肖勿避怨朕生平惟以真誠待人卿等何必瞻徇疑畏當以至誠報朕尚其各抒忠悃勿負朕推心置腹之至意庶用人得其道而吏治日隆矣

十五日奉

上諭嗣後凡查富戶將從外任丁憂及無罪致仕回京者

永遠免其行查如一併行查徒令不肖都統叅領等借
端取利於事甚屬無益且將伊等俱派富戶則人如何
能作好官自降旨之後若仍有索詐等情定行治罪

十八日歸化城都統丹晉奏報圖思海運米駝隻從
大同至歸化城八百四十八隻內損壞一百七十五

隻奉

上諭此項駝隻皆因圖思海等運米時不加意牧養以致
殘疾疲蠹數日之間損缺甚多如將此等駝隻交與察

哈爾土默特蒙古人等必致倒斃又復責令賠償蒙古人等殊覺枉抑朕早已洞悉此情恐其擾害蒙古特遣副都統勒什布前往令於交駝時將殘疾者盡行記檔此項損傷駝隻既係圖思海之故應俱著落圖思海賠償

十九日

諭大學士等國家建官分職於翰林之選尤為慎重必人品端方學問醇粹始為無忝厥職所以培館閣之材儲

公輔之器也從前

聖祖加意育才循循訓導又纂修各種書籍需員甚多故翰林院編檢幾至二百人庶吉士亦五六十人朕臨御之初未有編纂諸事又未能如

聖祖之善於訓導誠恐人才置之間散特多方錄用內而科道吏部外而道府州縣俱各隨材器使務令疏通今編檢尚有百餘人庶吉士尚有數十人著內閣大學士會同翰林院掌院教習秉公別擇其學問優長字畫端楷

或精於翻譯國書者留本衙門辦事及分各館纂修其
或才具練達可當科道吏部之選或長於吏治編檢可
為道府庶吉士可為州縣者一一分別具奏至或老病
衰廢願自解退者聽其以原官休致其有行止不端事
跡確實者奏聞革退今朕特恩開科人材輩出將來揀
選庶常朕當親加考試引見揀選至日後散館仍照舊
例以三等分用目今正屆殿試之期朕深知向有擬送
策聯鑽營甲第等弊殊可痛恨朕所點閱卷大臣俱係

平日實心委任之人各宜虛公謹慎杜絕諸弊倘有仍
蹈前轍者必嚴加處分務使文治日隆英材蔚起以副
朕顧俊興賢之至意

又總理事務王大臣議奏旗丁掛欠米石應令總漕
議定搭運年限再將弁丁發南追比奉

上諭康熙三十八年至五十年止掛欠者盡行寬免五十
一年至五十八年掛欠者暫停併追五十九六十六十
一年掛欠者如果幾年之內能一齊賠還朕亦施恩寬

免如仍延挨不肯竭力交清將新舊一併嚴追將此諭
旨併所議之處作速行文總漕張大有俟議奏時議覆

二十日

諭總理事務王大臣今年殿試在十月二十七日天氣已
寒諸貢士若照舊例在丹墀對策恐硯池冰結難於書
寫此一次著在太和殿內兩傍對策再傳諭總管太監
令多置火爐使殿內和煖諸貢士得盡心作文寫卷

二十二日戶部奏陝西省長武西鄉二縣浮糧仍照

例徵收奉

上諭長武西鄉二縣浮額錢糧屢年徵收甚累百姓著予

豁免

二十六日

諭戶部朕自御極以來宵衣旰食無日不以民依為念督撫以下守令以上凡有地方之責者均宜公忠體國仰副朕心今年夏月朕以北省二麥歉收差員到南省於秋成後採買米石以備賑貸平糶朕意切於為民正欲

酌盈劑虛以羨補不足也又恐有不便於民之處於差員臨行之時再三申諭地方米多方可採買不必定要買足今聞各省地方官因欽差買米禁止商販不許出境大負朕痾瘡一體之意甚屬不合况浙江及江南蘇松等府地窄人稠即豐收之年亦皆仰食於湖廣江西等處今秋成歉收若商販不通必致米價騰貴該部速即行文各省總督巡撫凡有米商出境任便放行使湖廣江西安慶等處米船直到蘇州蘇州米船直到浙江

毋得阻撓庶幾有無流通民皆足食以副朕愛養元元之意

又

諭工部琉璃亮瓦兩廠官地每月按間計標徵租相沿已久朕念兩廠多係流寓賃住貿易小民情可憫惻嗣後止徵地租免其按間計標逐月輸納著即通行曉諭以副朕撫恤窮黎至意

世宗憲皇帝上諭內閣卷十二